



Inuussutissarsiornermut Aatsitassanullu Ataatsimiititaliamut Assinga Siumumut Jens Napatumullu

Pillugu Siumut oqaaseqartartuata apeqqutaanut aamma ataatsimiittarfimmiit Jens Napatuup (N) apeqqutaanut akissutitut missingersuutip aappaat

28-05-2026
Suliap nr. 2025 - 23391

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Unammilleqatigiinneq pillugu Inatsisartut inatsisaata allangortinnissaa pillugu Inatsisartut inatsisaat pillugu siunnersuutip pkt. 27-p siullermeerneqarnerani Inatsisartuni ilaasortap Jens Napaatuup apeqqutaanut allakkatigut akissutitut matumuuna nassiunneqarput.

Siunnersuut nunatsinni pissutsinut immikkut ittunut tulluarsagaanera pillugu Siumut oqaaseqarnermini ernumassuteqarlutik oqaatigaat. Ilisimatitsissutigissavara, Naalakkersuisut aaqqissuusaanikkut pissutsit immikkuullarissut, niuerfitsinni unammilleqatigiinnermut periarfissanut killiliisinnaasut, eqqumaffigimmassuk. Taamaattumik ilaatigut siunnersuutigineqarpoq, unammilleqatigiinnermi oqartussaasut niuerfinnik misissuinnermi sakkut nutaat atorlugit pissutsinik taamaattunik misissuisinnaassallunilu naleqqussaasinnaanissaa.

Nunatsinni pissutsinut naleqqussaaneq pillugu

Naalakkersuisut aaqqissuusaanikkut pissutsit immikkuullarissut, Nunatta niuerfiani unammilleqatigiinnermut periarfissanut killiliisinnaasut, eqqumaffigilluarpaat. Tassani ilaatigut niuerfiit mikisuukkajunneri, inuussutissarsiutillit ikinneri, ungasissutsit annertuneri, aamma unammilleqatigiinnermi periarfissat killeqarsinnaaneri pineqartunut ilaapput.

Tamannarpiaq inatsisissatut siunnersuummut tunuliaqutinut ilaavoq. Unammilleqatigiinnermut inatsimmi inerteqqutitut aalajangersakkanik unioqqutitsisoqanngikkaluartoq, unammilleqatigiinnermut oqartussaasut aaqqissuusaanikkut pissusilersuutitigullu pissutsinik unammilleqatigiinnermut innarliisunik, atuisunut ajoqutaasunik, niuerfinnik misissuinnermi sakkussaq nutaq atorlugu misissuinissaminnut aamma pisuni immikkut ittuni naleqqussaaminnut periarfissaqalernissaat siunnersuutigineqarpoq.

Taamaattumik siunnersuut Nunatsinni niuernermi pissutsit arajutsinerunngilaq. Akerlinganiilli unammilleqatigiinnermi ajornartorsiutinik taamaattunik, niuerfinni mikisuni siammasissunilu takkussinnaasunik, aqutsisinnaanissamut sakkussat periarfissiissapput.

Taaguummut "niuerfinnik misissuineq"-mut tunngatillugu aamma politiinit misissortinnermut assigiinngissusaa

"Niuernermik misissuineq", tassaasoq tuluttuumit "market investigation"-imit nutserneqarsimasoq, unammilleqatigiinnermut inatsisit unioqqutinneqanngikkaluartut, suliaqarfik unammilleqatigiinnermut iliuutitigut imaluunniit aaqqissuusaaneratigut unammilleqatigiinnermut innarliinersoq pillugu aningaasatigut aamma unammilleqatigiinnermi inatsisitigut misissuineramik aallartitsinertut paasineqassaaq.

Misissuineq aallaavigalugu pissutsinik taamaattunik peqartoqarnera uppersarneqarsinnaappat, ingerlatsisunut naleqquttunut iliuutsitigut peqqussutinik, ingerlatsisut siunissami malitassaanik, siunnersuut malillugu tunniussisoqarsinnaassooq.

Peqqussutinik taamaattunik tunniussisinnaasoqassatillugu, Atuisartoqarnermut Unammilleqatigiinnermullu Aqutsisoqarfik niuerfinnik misissuinermigut uppersarneqarsavaa, unammilleqatigiinnermut innarliineq ersarittuusoq malunnaatilimmillu ajoqusiisoq, inatsisitigut akuliunnissamik tunngavissaqartoq. Aamma peqqussuteqarnissaq pisariaqartoq, eqqortuusoq, unammilleqatigiinnermut innarliisup suussusersineqartup ikiorsernissaanut atatillugu naleqquttuusoq, aamma unammilleqatigiinnermut pissutsinut sunniuteqarluartumut siuarsaasuusoq uppersarneqarsinnaassaaq.

Niuerfimmik misissuinnissaq pillugu aallaqqaassumik aalajangiussamut missingersuut tamanut ammasumik tusarniaassutigineqassaaq. Misissuineq peqqussuteqarnissamut tunngaveqarnera uppersarneqarsinnaappat, ingerlatsisunut naleqquttunut kiisalu suliaqarfinnut inuussutissarsiortunik oqartussaasunut peqqussutit pilersaarutigineqartut tusarniaassutigineqassapput. Soorlu aningaaserivinnut peqqussutigliortoqarnissaanik isumaliutersuuteqartoqarsimappat Finanstilsynet-iusinnaavoq.

Naak oqaaseq "misissuineq" taaguummi ilaagaluartoq, tassani niuerfimmi unammillernermi ajornartorsiutinik aaqqissuusaanikkut imaluunniit iliuutsitigut pilersunik aningaasatigut niuerfimmilu misissueqqissaarnertigut misissuinerit, kiisalu taakkua iliuutsitigut siunissami peqqussutinik qanoq ikiorserneqarsinnaatigineri pineqarput.

Ingerlariaasia politiit pisortatigoortumik imaluunniit pisaasiattut sulinerannut attuumassuteqanngilaq. Niuerfimmik misissuinissamut pingaarnertut niuerfimmik misissueqqissaarnissamut, aningaasaqarnermut aamma unammilleqatigiinnermut inatsisinut piginnaaneqarnissaq pisariaqarpoq.

Unammilleqatigiinnermi oqartussaasut nakkutilliinnermut aamma atuutsitsinnermut piginnaatitaanera unammilleqatigiinnermi inatsimmi tunngaveqarput, pinerluttulerinnermilu eqqartuussisarnermik inatsisip avataaniilluni. Politiilli piginnaatitaanerat Kalaallit Nunaanni eqqartuussisarnermik inatsimmi tunngaveqarpoq, pinerluttulerinnermilu eqqartuussisarnermik inatsisip iluaniilluni. Taamaattumik Atuisartoqarnermut Unammilleqatigiinnermullu Aqutsisoqarfik politiit piginnaasaata assinginik piginnaasaqanngilaq, aamma siunnersuummi uani tamanna pinaviangilaa.

Naalakkersuisut allappaat taaguut ”niuerfinnik misissuineq” (markedsefterforskning) paatsoortitsisinnaasoq, pissutigalugu oqaaseq ”misissuineq” (efterforskning) aamma politiinut attuumassuteqartumik atorneqartarmat. Taamaattumik Naalakkersuisut taaguut alla, soorlu niuerfimmik misissuineq (markedsundersøgelse) imaluunniit niuerfinnik misissueqqissaarneq (markedsanalyse) isumaliutigineqarnissai ammaffigaat, tassani Inuusutissarsiornermut Aatsitassanullu Ataatsimiititaliap tamanna naleqqussorissappagu.

Atuisartoqarnermut Unammilleqatigiinnermullu Aqutsisoqarfiup nakkutilliinnermut aamma atuutsitsinnermut piginnaasaanut tunngatillugu
Unammilleqatigiinnermi oqartussaasut taamaallaat unammilleqatigiinnermi inatsimmi inerteqqutitut aalajangersakkanik inatsisitigut nakkutilliissanngitsut siunnersuutip nassataaraa, niuerfinnili pissutsinik aaqqissuusaanerinillu naleqqutinngitsunik, unammilleqatigiinnermut innarliisunik, aningaasatigut aamma niuerfinnik misissueqqissaarnikkut nakkutilliinissaq aamma nassartarissavaa.

Unammilleqatigiinnermi oqartussaasut piginnaasaanik aamma unammilleqatigiinnermi inatsisip atorneqarfianut annertusaaneruvoq. Annertusaaneq pisariaqartoq nalilerneqarpoq, pissutigalugu Nunatsinni unammilleqatigiinnermi ajornartorsiutit unioqqutitsinikkut iliutsininngaanniit peqquteqartuaannanngimmata, kisiannili unioqqutitsinngikkaluarluni iliutsinit imaluunniit aaqqissuusaanikkut pissutsinit, taamaattorli unammilleqatigiinnermut innarliisunik, peqquteqarsinnaammata.

Unammilleqatigiinnermi inatsimmi unioqqutitsineq pillugu nakkutilliinnermi sulianut atatillugu Atuisartoqarnermut Unammilleqatigiinnermullu

Aqutsisoqarfiup ullumikkut pisinnaasareriigaasa assinginik, aqutsisoqarfik niuerfinnik misissuinermit aamma immikkoortortanik misissuinermit atatillugu nakkutilliinermut aamma atortuutitsinermut pisinnaatitaanera:

- paasissutissanik pisussaaffigisanik piумаaffiginninneq, tak. § 30,
- sioqqutsisumik eqqartuussisup aalajangernera malillugu aamma politiiniit ikiorneqarnikkut timitalimmik misissuinerit, tak. §§ 31-33,
- pinngitsaaliissummik akileeqqussutinik, pisortatigoortumik akiliisitsissutinik akileeqqusinerit aamma politiinut unnerluutiginninnernik tunniussinerit, tak. §§ 37-38a.

Taamaalilluni siunnersuut unammilleqatigiinnermut oqartussaasunut nakkutilliinermut aamma atortuutitsinermut pisinnaatitaaffinnik nutaanik pilersitsinnigilaq aamma politiitut oqartussaasutut piginnaalersitsinnigilaq. Oqartussaasut piginnaasaasa aamma inatsisip atornerqarfissaata annertusineqarnissaanik siunnersuummut atatillugu periarfissat pioreersut taamaallaat annertusineqassapput.

Atuisartoqarnermut Unammilleqatigiinnermullu Aqutsisoqarfiup nakkutilliinermut aamma atuutsitsinermut piginnaatitaanera ingerlatsinissamut inatsisit nalinginnaasut, tassannga aamma tunngaveqarnissamut, pisariaqartitanut aamma nalilersuutinut piumasaaqatit, ataani inissisimajuaannarput.

Atuisartoqarnermut Unammilleqatigiinnermullu Aqutsisoqarfik suliani taamaattuni nalunaaqqaaratik misissuiartortarnissaminut tunuarsimaartariaqarpoq, suliffeqarfik inatsimmik unioqqutitsisimaneranik ilimasunnermik niuerfimmik misissuineq nassataqanngimmat. Misissuinerup naammassinissaanut pisariaqarpat aamma niuerfimmik misissuinerup sunniutigisinnaasaanut atatillugu naapertuuppat nakkutilliinerit taamaallaat atornerqartariaqarput.

Nakkutilliinissap pisinnaanissaanut Kalaallit Nunaata Eqqartuussivianiit eqqartuussisup aalajangerneranik peqartoqarnissaata tamanna tunngavilersorjaa, tak. Inatsisartut inatsisaat pineqartumi § 31, imm. 4. Taamaasilluni nakkutilliineq pisariaqartoq aamma naleqquttoq aqutsisoqarfiup naliligaa sioqqutsisumik eqqartuussiviup nakkutilliinerata ataaniippoq.

Nakkutilliinerup suliarineqarani Kalaallit Nunaata Politiivii Atuisartoqarnermut Unammilleqatigiinnermullu Aqutsisoqarfimmuut ikiuuttassapput, tak. unammilleqatigiinnermut inatsimmi § 33. Politiit ikiutaaneri suliamut allannguinnigilaq, suli suliaq pisortatigut unammilleqatigiinnermut inatsisigut suliaavoq, politiit misissuisarnerannut tunngassuteqarani.

Suliffeqarfiit inatsisitigut isumannaatsuunissai pillugit

Siumut apeqqutilliivoq qanoq suliffeqarfiit inatsisitigut isumannaatsuunissai qulakkeerneqassanersoq.

Suliffeqarfiit inatsisitigut isumannaassusaat ingerlarngani arlalitsigut qulakkeerneqartarpoq.

Siullertut, niuerfimmik misissuinissamik aallartitsinissamut tunngavilersukkamik uppersakkamillu tunngavilersuisoqartassaaq.

Tullertut, niuerfimmik misissuisoqartarnissaa pillugu Unammilleqatigiinnermut Ataatsimiititaliamit aalajangerneqartassaaq, tassaasoq Atuisartoqarnermut Unammilleqatigiinnermullu Aqutsisoqarfiup misissuisarnissaanut piginnaasiisartoq.

Pingajuattut, niuerfimmik misissuinissamik aallarnersaatitut aalajangiissut aamma peqqussutigineqarsinnaasutut pilersaarutigineqartut tusarniaassutigineqartassapput. Tamanna inaarutaasumik aalajangiisoqartinnagu suliffeqarfiit, immikkoortortani oqartussaasut, allallu inuussutissarsiuteqartut naleqquttut pineqartut oqaaseqaateqarsinnaanissaanut periarfissiisassaaq.

Sisamaattut, peqqussutigineqarsinnaasut pisariaqartussaassapput, tulluartausassallutillu naleqquttuusassapput. Niuerfik akinik qaffasissunik imaluunniit inuussutissarsiutillit ikinnerinik sunnertissimanagera taamaallaat peqqutaallutik peqqussutinik nalunaartoqaqqusaasassanngilaq. Unammilleqatigiinnerup innarlerneqarnera uppersarneqartassaaq, aamma peqqussutit tassunga ikiuinissamut tulluartausassapput.

Tallimaattut, aqutsisoqarfiup pinngitsaaliissummik paasissutissanik aamma nakkutilliinissamik piumaffiginninnissamut pisinnaatitaaffinnik atuinera, suliamik ingerlatsinissamut inatsisini piumasaqaatit nalinginnaasut ataaniippoq. Aammattaaq nakkutilliisoqassatillugu sioqqutsisumik eqqartuussisup aalajangernera pisariaqarpoq.

Unammilleqatigiinnermut ataatsimiititaliap atuuffia pillugu

Unammilleqatigiinnermut inatsimmi § 26, imm. 2-mi allassimavoq, Atuisartoqarnermut Unammilleqatigiinnermullu Aqutsisoqarfiup, Unammilleqatigiinnermut Ataatsimiititaliamut allattoqarfiusup, ataatsimiititaliap sinnerlugu Inatsisartut inatsisaata ulluinnarni allaffissornertaa ingerlatarigaa.

Taamaattumik suliani anginerni tunngaviusuniluunniit ataatsimiititaliap aalajangiisarnissani pingaartumik atuuffigaa, kiisalu naleqqussaanerit imaluunniit tapersiinnermik aaqqiissutit unammilleqatigiinnermut innarliisut

pillugit oqartussaasut allat ilisimatittarnissai, tamannalu siunnersuummi uani allannguuteqarnaviangilaq.

Niuerfimmik misissuineq pillugu inatsisit nutaanut atatillugu, aqutsisoqarfiup misissuisinnaanissaanut piginnaatissallugu ataatsimiititaliaq aalajangiippat, niuerfimmik misissuineq aatsaat pisinnaassaaq, tak. siunnersuutigineqartumi § 30 a, imm. 1. Taamaattumik aqutsisoqarfik, ataatsimiititaliamut allattoqarfusoq, taamak misissuisinnaanissaanut tunngavissaqarnersoq pillugu naliliisoqarnissaanut atatillugu ataatsimiititaliaq pingaarutilimmik atuuffeqarpoq.

Ataatsimiititaliap ilaasortassaanik toqqaasarnermut atatillugu, Naalakkersuisut atuisartoqarnermut kattuffinnit ataatsimoortunit inassuteqaat malillugu ilaasortamik ataatsimik toqqaasarnerisa allanngortinneqarnissaa taamaallaat siunnersuutigineqarpoq. Kalaallit Nunaanni atuisartoqarnermut kattuffeqanngilaq. Ilaasortaq taanna atuisartoqarnermut pissutsinik immikkut paasisimasaqarnissaa sulii piumasagaataavoq, taamaasilluni taassumap isiginnittaasia paasisimanninneralu ataatsimiititaliami sulii ilaassallutik.

Siunnersuutip Atuisartoqarnermut Unammilleqatigiinnermullu Aqutsisoqarfimmu aningaasatigut kinguneqartitsinissaa pillugu

Siumut aperivoq, suleriaatsit nutaat, piginnaanerit pisariaqartitat nutaat aamma allaffissornikkut sulii assat amerlanerit eqqunneqarpata, aqutsisoqarfiup aningaasaqarnikkut sinaakkutai pioreersut iluani allannguutit naammassinnaanissai piviusorsiornerunersooq.

Inatsisissatut siunnersuummut nassuiaatini takuneqarsinnaavoq, pisortanut aningaasartuutiniq allanik siunnersuut nassataqarnissaa naatsorsuutigineqanngitsoq. Suliniutinut nutaanut aningaasartuutissat Atuisartoqarnermut Unammilleqatigiinnermullu Aqutsisoqarfiup aningaasat atorsinnaasaatut akuerisat iluani akilerneqarnissaat naatsorsuutigineqarpoq, tassani aqutsisoqarfiup ataatsimut suliniutaasa annertussusaasa annertusineqarnissaat siunertaanngimmat.

Taamaattumik siunnersuut aqutsisoqarfiup allaffissornikkut ingerlatsinerani atugassiissutaanik pingaarnersiutinissaaq, tassannga sulisunut nutaanik ilinniarnikkut pitsanngorsaanikkullu suliniuteqarnerit ukkatigineqarnissai pisariaqassaaq.

Tassunga atatillugu erseqqissarneqartariaqarpoq, sulianut nutaanut taakkununnga politiit suliatigut piginnaasai pisariaqartinneqarnavianginneri. Qulaani allassimasutut niuerfimmik misissuineq politiit misissueriaasiattut inngilaq, kisiannili aningaasatigut aamma niuerfimmik misissueqqissaarnikkut misissuinerulluni. Taamaattumik pingaartumik piginnaasat naleqquttut

tassaallutik aningaasaqarnikkut, unammilleqatigiinnermut inatsisitigut aamma misissueqqissaarnikkut piginnaasat.

Ulluinnarni nioqqutissaqarfiit iluani niuerfinnik misissuinissap siulliup naammassinissaanut aningaasanut inatsimmi 2026-mi aamma 2027-mi aningaasaliisoqarpoq. Taamaattumik ukiumi matumani imaluunniit 2027-mi atugassiissutinik allanik pisariaqartitsisoqanngitsoq naliliisoqarpoq.

2028-mut aningaasanut inatsisip suliarineqarneranut atatillugu, suliaqarnissamut annertunerusumik pisariaqartitsisoqartoq inatsisit nutaanut misilittakkat takutippagu, niuerfinnik misissuinernut imaluunniit immikkoortortanut misissuinernut allanik aningaasaliisoqartariaqarnersoq naliliisoqarsinnaavoq.

Niuerfiit tamarmik maliinnartumik misissorneqarnissaanik siunnersuut nassataqanngilaq, kisianni immikkut pisariaqartitsisoqartoq nalilerneqartillugu, unammilleqatigiinnermut oqartussaasut sakkunik taakkunannga atuisarsinnaanerannut periarfissaqarnissaanik nassataqarluni.

Iluanaaruteqarneq pillugu inatsimmut isumaliutit pillugit

Jens Napatoq iluanaaruteqarneq pillugu inatsiseqalersinnaanissaq, imaluunniit iluanaarutinik naleqqussaasoqarsinnaalernissaq pillugu apeqquteqarpoq.

Naalackersuisut iluanaaruteqarneq pillugu inatsit atorlugu niuerfinnik nalimmassaanissaminnut maannakkuugallartillugu tapersiingillat. Naalackersuisulli ilisimavaat, taamatut nalimmassaanermi iluaqutissartaqarlunilu ajoqutissartaqartoq.

Iluanaaruteqarneq pillugu inatsit unammilleqatigiinnermut inatsimmi siunnersuutigineqartumiit allaanermik toqqaannarnermillu nalimmassaanerussiaaq. Iluanaaruteqarneq pillugu inatsit suliffeqarfiup nioqqutissamut imaluunniit nioqqutissanut aalajangersimasunut qanoq annertutigisumik iluanaaruteqarsinnaaneranut nalinginnaasumik nalimmassaaneruvoq.

Nunatsinni akit qaffasissusai suliffeqarfiup iluanaarutaanniit taamaallaat sunnertinneq ajorput. Nioqqutissap akianiit, assartuinnermi akinit, pisisartukinnermit, aningaasartuutillu nalinginnaasuniit, soorlu pisiniarfiup tunisinermini matussusigaanit akit qaffasissusai sunnerneqartarput. Tamakku pisariitsumik ajornanngitsumillu naliliiffigineqarsinnaanngillat nalimmassartariaanatillu.

Kisiannili niuerfinnik misissuineq pillugu, aamma niuerfinni immikkoortortani misissuineq pillugu inatsisissatut siunnersuutit siunertaat tassaavoq, aaqqissuussaaneq pissutaalluni imaluunniit iliuuserineqartut pissutaallutik unammilleqatigiissinnaanermut ajornerulersitsisoqarnerisooq pillugu unammilleqatigiinnermut oqartussaasut misissuinissaannut periarfissiineq, misissuisoqareernermilu nalilerneqassaaq aaqqissuussaanerit iliuuserineqartullu peqqussutinik aalajangersimasunik pissutsinillu naleqquttunik pitsanngorsarneqarsinnaanersut.

Atuisartunut siunnersuisartoqatigiit sumiiffimmilu atuisartunut ataatsimiititaliat pillugit

Jens Napatoq paasissutissiissutigineqartut kingorna atuisartunut siunnersuisartoqatigiit sumiiffimmilu atuisartunut ataatsimiititaliat pillugit apeqquteqarpoq.

Naalakkersuisut atuisartunut siunnersuisartoqatigiimmik, najukkamilu atuisartunut ataatsimiititaliamik peqarnissamik kissaateqartoqarneranut paasinnilluarput.

Inatsisissatut siunnersuulli atuisartunut siunnersuisartoqatigiimmumut, najukkamilu atuisartunut ataatsimiititaliamut tunngassuteqanngilaq.

Najukkami atuisartunut ataatsimiititaliamik peqarnissaq atuisuniit kissaatigineqarpat, ataatsimiititaliamilu innuttaasut atuisartunut politikkinut tunngasunik oqalliffigisinnaasaanik, imaluunniit innuttaasut peqatigiillutik najukkami pisiniarfinnut saaffiginninnissamik periarfissamik peqarnissaat kissaatigineqarpat, oqalliffiit taakku najukkani ataasiakkaani pilersinneqarsinnaapput kommuninilluunniit.

Atuisartut Atuisup allattoqarfianut Nuummiittumut oqarasuaatikkut nittartakkatigulluunniit saaffiginnillutik sukkasuumik siunnersorneqarsinnaapput.

Aammattaaq innuttaasut Atuisartut Pisisartullu Maalaarutaannik Aalajangiisartunut maalaaruteqarnissaminnut periarfissaqarput.

Aammattaaq atuisartut pisinnaatitaaffii inatsimmi allami isumannaarneqarsimapput.

Siunnersuut pineqartoq naapertorlugu Atuisartoqarnermut Unammilleqatigiinnermullu Aqutsisoqarfiup niuerfinni immikkoortuni misissuinissaanut periarfissiivoq, soorlu akit qaffasissut tunngavigalugit imaluunniit iluanaaruteqarnermut tunngatillugu nalornissuteqarneq

tunngavigalugu misissuisoqarnissaanut periarfissiilluni. Tamanna atuisartunut aamma iluaqutaassaaq.

Naalakkersuisut taamaattumik nalilerpaat, atuisartunik illersuineq annertusarniarlugu atuisartunut siunnersuisartoqatigiiffimmik akileraarutiniit aningaasaliiffigineqartumiit peqarnissamik pisariaqartitsisoqanngitsoq. Atuisartunut siunnersuisartoqatigiiffimmik assinganiluunniit pilersitsinissamik inatsisitigut periarfissiisoqanngilaq imaluunniit aningaasaliisoqarnikuunngilaq.

Naalakkersuisut tamanna tunngavigalugu atuisartunut siunnersoqatigiimmik nunatsinni akileraarutiniit aningaasaliiffigineqartumiit pilersitsinissamik piunasaqanngillat.

Grønlandsbanken A/S-imiit tusarniaanermut akissuteqaat pillugu

Grønlandsbanken A/S-imiit tusarniaanermut akissuteqaat qaqinneqassappat, tamanna Ataatsimiititaliap suliaqarnermini maluginiaqquneqarpoq.

Sulisitsisut Grønlandsbanken-ip ernumassutai ilisimatitsissutigineqareersut malillugit ernumassutiginnigilaat. Ernumassutit ilai paatsoornermiit pinngorsimarpasipput, tassa paasissutissat isertuussat tunniunneqartussanngorneri pillugit paatsoorneq.

Nipangiussisimasussaataitaanermik paasitinneqarsinnaatitaanermilu malittarisassat akerleralugit suliffeqarfiup paasissutissai isertuussat saqqummiunneqarnissaat imaluunniit siammarterneqarnissaat siunnersuutip siunertarinngilaa.

Ilanngullugu erseqqissaatigineqassaaq, nunani allani avannarlerni malittarisassaqarmat imaluunniit atugassiaqarmat unammilleqatigiinnermut pisorta qarfiit assigiinngitsunik inatsisinik unioqputitsineriinaanngitsunik, kisiannili niuffaffinni pissutsinik misissuinissaannik periarfissiisut. Nunatta periusai taamaasillutik nunani allani avannarlerni periutsinut tunngaviusumik allaanerunaviangillat.

Naalakkersuisut eqqumaffigaat, suliffeqarfiit paasissutissanik isertuussanik suliaqartarneq pillugu ernumassuteqartut. Unammilleqatigiinnermut oqartussaasut nipangiussisimasussaataitaanermik malittarisassanik malinnittussaataitanerat pillugu siunnersuutigineqartumi allanngortinneqanngilaq, suliffeqarfiullu paasissutissai illersorneqarsinnaasumik suliarineqartartussaasut. Niuerfinni misissuinermut niuerfinnilu aalajangersimasuni misissuinermut siunertat tassaapput, niuffaffinni pissutsinik

tungavissaqarluartumik nalilersuisinnaanermik pilersitsineq, suliffeqarfiillu
ataasiakkaat pillugit paasissutissat saqqummiunneqarnissai imaluunniit
siammarterneqarnissai siunertaanani.

Inussiarnersumik inuulluaqqusillunga

Med venlig hilsen



Múte B. Egede

Nunanut allanut, Inuussutissarsiornermut, Aatsitassanullu Naalakkersuisoq
Naalakkersuisoq for Udenrigsanliggender, Erhverv og Råstoffer
Minister of Foreign Affairs, Business and Mineral Resources